

*amica Republica legationi destinatae, edicti pontificii promulgatione nota inuratur, ea praesertim in causa, in qua minime de religione ageretur: jam, si id permittat, dignitatem regiam in discrimen vocatum iri.* Rex summam ex iis, quae inter Pontificem atque Rempublicam acciderant, molestiam cepisse, vultu verbisque significat; statimque vocari Senatum jubet, in quo, ne absque ejus permissu edictum vulgaretur, decretum est; idque Nuntio, qui eam ob rem urbe exierat, Cardinalique nuntiari jussum. Ad Pontificem quoque datae literae, quibus, *ut satis Reipublicae faceret, in causa praesertim ad religionem minime spectante,* petebatur: *alios Reges Reipublicae causae favere, rationes illius probare, sese intelligere: ne edictum in Sarmatia vulgaretur, idem in Henrici tertii, Henrici quarti, Galliae ac Navarrae Regum, atque in Caesaris Estensis causa in Sarmatia servatum.* In Gallia nullis pontificii oratoris officiis vel precibus a veteri in Rempublicam benevolentia Henricus averti poterat; liber Petro Priolo, oratori, ad templa aditus; nihil de prisca consuetudine immutatum. Cum Carolo Emanuele, Allobrogum Duce, omni officiorum genere actum, ne supplicationibus, quae pro indicto jubilaeo habendae erant, Petrum Contarenum, legatum, admitteret: at Carolus, ut Reipublicae offendendae causam amputaret, filiarum Principum interventu, ab invitandis Principum legatis abstinuit. Cum primum emissi fulminis nuntius in Britanniam est allatus, in publicis comitiis acerba gravissimaque in Catholicos decreta sunt. Rex, publicationis bonorum necisque poena proposita, sanxit, ut omnes subjecti intra anni spatium jurejurando assererent, seseque obstringerent; neque Paulo quinto, neque successoribus se posterosque suos quacumque ex causa a coetu fidelium amovendi, in Regem regnumque ipsum quidpiam molendi jus esse: oppositam huic sententiam, veluti religioni adversam haeticamque, detestarentur atque ejerarent: ex quo multae in Anglia turbae excitatae, quae haud dubie ab Italiae fluctibus emergere.

Romae Halincurtius, Henrici Regis legatus, una cum Eboricensi Cardinale atque Allobrogum oratore in aedibus Joannis Delphini, Cardinalis Vicetini, conveniunt; de toto negotio

*Sigismundi Regis decretum de Pontificum edicto non promulgando.*

*Sigismundi Regis ad Pontificem de Veneta causa litera.*